



Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo

GRADSKO VIJEĆE

DEKLARACIJA
O OSUDI NASILJA PROTIV CIVILA U POJASU GAZE I IZRAELU

Sarajevo, oktobar 2023. godine

Adresa: Hamdije Kreševljakovića 3
71000 Sarajevo, BiH
Tel: +387 33 216 659
Fax: +387 33 205 874
Email: gsgv@sarajevo.ba
Web: gradskovijece.sarajevo.ba



Grad Sarajevo je glavni grad Bosne i Hercegovine, države u kojoj su počinjeni ratni zločini u periodu 1992.-1995. godina i u periodu 1941.-1945. godina, u kojoj je počinjen i presuđen genocid nad Bošnjacima Srebrenice, grad koji je preživio 1425 dana opsade, razaranja, ubijanja, teroriziranja civilnog stanovništva, u kojem je ubijeno 1.601 dijete od strane agresora, grad koji je iskusio sve strahote agresije i koji je nakon uspostave mira smogao snage i našao načine da se uspravi.

Građani Sarajeva iz svih navedenih razloga, najbolje razumiju strahote koje proživljavaju civili u ratnoj zoni i zato Gradsko vijeće Grada Sarajeva, glavnog grada Bosne i Hercegovine, smatra da ima pravo, ali i civilizacijsku obavezu da donese te je, na osnovu člana 31. stav (1) tačka b) i člana 77. stav (1) Statuta Grada Sarajeva („Službene novine Kantona Sarajevo“, broj 7/23), Gradsko vijeće Grada Sarajeva, na sjednici održanoj dana 25.10. 2023. godine, donijelo je

DEKLARACIJU O OSUDI NASILJA PROTIV CIVILA U POJASU GAZE I IZRAELU

- Osuđujemo nasilje, terorizam i počinjene ratne zločine i zločine u Pojasu Gaze i Izraelu. Za ono što smo vidjeli nema opravdanja i odgovorni moraju snositi posljedice za svoja nedjela.
- Tražimo da se putem UN-a aktivira mehanizam koji će istražiti i utvrditi ratne zločine i zločine počinjene u Pojasu Gaze i Izraelu. S tim u vezi zahtijevamo da se odgovorni identificiraju i da im se sudi. To je praksa koja je primijenjena prema odgovornim za počinjene zločine u Ruandi i na prostoru bivše Jugoslavije. To je mehanizam koji je aktiviran za počinjene zločine u Ukrajini i nema ni jednog razloga da se isti, pravedan i civilizirani pristup ne primjeni na aktualni ratni sukob na Bliskom istoku.
- Zločinci ne smiju ostati skriveni. Oni su pojedinci s imenom i prezimenom koji su kreirali, naredili i izvršili zločine.
- Protiv smo bilo kakvih nasilnih akcija u kojima se ugrožava civilno stanovništvo u Pojasu Gaze i Izraelu, i koje za metu imaju bolnice, škole, mjesta na kojima se okupljaju omladina, starci, žene i djeca.
- Oštro osuđujemo akcije koje imaju za cilj da otežaju život civilima. To je protivno međunarodnom humanitarnom pravu i pozivamo donosioce odluka da to ne čine jer će odgovarati za svoje nehumano postupanje i barbarizam.
- Osuđujemo kidnapovanje ljudi i njihovo držanje u talačkom statusu. Tražimo da se tim ljudima odmah omogući povratak u slobodu, svojim porodicama. Takvo nehumano i neljudsko ponašanje nema opravdanje ni u Božjim niti u svjetovnim propisima.
- Apelujemo na sve političke i vojne donosioce odluka u Izraelu i Pojasu Gaze da prije poduzimanja bilo kakvih akcija razmisle o posljedicama svojih postupaka jer one mogu biti sa nesagledivim posljedicama po živote ljudi i podliježu krivičnoj odgovornosti
- Međunarodno pravo mora doticati svaku državu i donosioce odluka jer će u protivnom svijetom zavladati pravo sile, a ne sila prava. Onda nismo civilizirani svijet i vraćamo se u doba barbarizma. Tada će zlo zakucati na svačija vrata jer bez prava nema ideala pravde, a time ni mira i posljedice će trpjeti nedužni ljudi širom svijeta.
- Pozivamo na odgovornost lidere najmoćnijih država svijeta jer imaju efikasne ekonomske i političke mehanizme da zaustave krvoproliće koje se dešava pred očima cijelog svijeta. Mi u Bosni i Hercegovini to znamo da oni to mogu kada hoće. Ovo je trenutak kada lideri najmoćnijih država svijeta polažu ispit doraslosti funkcijama koje obavljaju.
- Pozivamo profesionalne, nezavisne i odgovorne medije i njihove časne novinare da objektivno informiraju svjetsku javnost o ratnim dešavanjima u Pojasu Gaze i Izraelu. Mi znamo značaj i ulogu časnih novinara koji svojim istinitim izvještavanjem kreiraju svjetsko

javno mnijenje i vrše pritisak na vlade najmoćnijih zemalja svijeta da poduzimaju efikasne mjere na zaustavljanju krvoprolića.

- Pozivamo građane cijeloga svijeta da ustanu protiv nasilja i traže od svojih vlada da poduzimaju efikasne mjere da se zlo koje traje na Bliskom istoku zaustavi. One to mogu ako žele.
- Odbijamo neselektivno svrstavanje na bilo koju stranu u sukobu, ali duboko svjesni nesrazmjera u primjeni nasilničkih akcija u kojima stradaju hiljade nedužnih ljudi. S tim u vezi pozivamo i svjetsku javnost da se suzdrži od neselektivnog svrstavanja i uopćavanja, koje doprinosi globalnoj polarizaciji, a što nas može odvesti u nasilje i teror od kojeg niko i nigdje neće biti siguran i čije ćemo posljedice svi trpjeti.
- Grad Sarajevo je spreman pružiti humanitarnu pomoć ugroženom civilnom stanovništvu u ratom zahvaćenom području i poziva zdravstvene institucije u BiH da se izjasne o načinu na koji mogu pomoći ljudima kojima je potrebna medicinska pomoć.

PREDSJEDAVAJUĆI GRADSKOG VIJEĆA



Jasmin Ademović

Broj: 01-GV-02-1573/23
Sarajevo, 25.10.2023. godine